



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍՊՈՐՏԻ ԵՎ
ԵՐԻՏԱՍԱՐԴՈՒԹՅԱՆ ՀԱՐՑԵՐԻ ՆԱԽԱՐԱՐՈՒԹՅՈՒՆ
ՆԱԽԱՐԱՐ

Հ Ր Ա Մ Ա Ն

23 հունիսի 2014 թ. № 129 - Ա/1

ք. Երևան

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԱԽԱԳԱՀԻ ՄՐՑԱՆԱԿԻ ՀԱՄԱՐ
ՀԱՇՄԱՆ ԴԱՄՈՒԹՅՈՒՆ ՈՒՆԵՑՈՂ ԱՆՁԱՆՑ
«ԼԱՎԱԳՈՒՅՆ ՄԱՐԶԱԿԱՆ ԸՆՏԱՆԻՔ» 2014 ԹՎԱԿԱՆԻ ՄՐՑՈՒՅԹԻ
ԿԱՆՈՆԱԿԱՐԳԸ ՀԱՍՏԱՏԵԼՈՒ ՄԱՍԻՆ

Համաձայն «Ֆիզիկական կուլտուրայի և սպորտի մասին» Հայաստանի Հանրապետության օրենքի 9-րդ հոդվածի «գ» և «ժ.1» կետերի և Հայաստանի Հանրապետության Նախագահի 2004 թվականի մայիսի 20-ի «Ֆիզիկական կուլտուրայի և սպորտի բնագավառում Հանրապետության Նախագահի մրցանակներ հիմնելու մասին» ՆԿ-113-Ն կարգադրության 1-ին կետի «դ» ենթակետի՝ *հրամայում եմ՝*

1. Հաստատել՝ Հայաստանի Հանրապետության Նախագահի մրցանակի համար հաշմանդամություն ունեցող անձանց «Լավագույն մարզական ընտանիք» 2014 թվականի մրցույթի կանոնակարգը՝ համաձայն հավելվածի:

2. Սահմանել, որ սույն հրամանի 1-ին կետում նշված մրցույթն անցկացվում է «Հայաստանի Հանրապետության 2014 թվականի պետական բյուջեի մասին» ՀՀ օրենքի № 1 հավելվածի № 1 աղյուսակի 08 բաժնի 01 խմբի 01 դասի «07. Լավագույն մարզական ընտանիք» մրցույթի անցկացում» ծրագրի համաձայն, որն իրականացնում է Հայաստանի Հանրապետության սպորտի և երիտասարդության հարցերի նախարարության «Սպորտի և երիտասարդական ծրագրերի իրականացման գրասենյակ» պետական հիմնարկը:

3. Սույն հրամանի կատարման հսկողությունը վերապահել Հայաստանի Հանրապետության սպորտի և երիտասարդության հարցերի նախարարի տեղակալ Խ. Ասրյանին:



Գ. ՂԱԶԱՐՅԱՆ

Կ Ա Ն Ո Ն Ա Կ Ա Ր Գ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԱԽԱԳԱՀԻ ՄՐՑԱՆԱԿԻ ՀԱՄԱՐ
ՀԱՇՄԱՆԴԱՄՈՒԹՅՈՒՆ ՈՒՆԵՑՈՂ ԱՆՁԱՆՑ
«ԼԱՎԱԳՈՒՅՆ ՄԱՐԶԱԿԱՆ ԸՆՏԱՆԻՔ»
2014 ԹՎԱԿԱՆԻ ՄՐՑՈՒՅԹԻ

1. ՆՊԱՏԱԿՆԵՐԸ ԵՎ ԽՆԴԻՐՆԵՐԸ

1. Հայաստանի Հանրապետության Նախագահի մրցանակի համար «Լավագույն մարզական ընտանիք» մրցույթի հաշմանդամություն ունեցող անձանց (այսուհետ՝ Մրցույթ) նպատակներն են՝

- 1) ֆիզիկական կուլտուրան և սպորտը հասանելի դարձնել հաշմանդամություն ունեցող ընտանիքներին.
- 2) ֆիզիկական կուլտուրայի և սպորտի միջոցով նպաստել հաշմանդամություն ունեցող ընտանիքների ֆիզիկական և հոգեբանական վերականգմանը.
- 3) խթանել հաշմանդամություն ունեցող ընտանիքների՝ հասարակությանը ինտեգրվելու գործընթացը.
- 4) կազմակերպել նրանց ակտիվ հանգիստը:

2. Մրցույթի խնդիրներն են՝

- 1) հաշմանդամային սպորտի մասսայականացում և քարոզում.
- 2) հաշմանդամային սպորտի զարգացման խթանում, սոցիալական հավասարության խթանում.
- 3) հաշմանդամություն ունեցող անձանց շրջանում բարոյահոգեբանական մթնոլորտի բարելավում.
- 4) ֆիզիկական կուլտուրայի և սպորտի միջոցով ընտանեկան կապերի ամրապնդում և առողջ կենսակերպի գաղափարների արմատավորում.
- 5) տարածքային կառավարման և տեղական ինքնակառավարման մարմինների կողմից հաշմանդամային սպորտի ուղղությամբ կատարվող աշխատանքների խթանում:

2. ԺԱՄԿԵՏԸ ԵՎ ՎԱՅՐԸ

3. Մրցույթն անցկացվելու է տվյալ օրացուցային տարվա հուլիսի երկրորդ կեսին Ծաղկաձորի գլխավոր մարզահամալիրում:

3. ՊԱՏԱՍԽԱՆԱՏՎՈՒԹՅՈՒՆԸ

4. Մրցույթի նախապատրաստման և անցկացման աշխատանքները համակարգում է Հայաստանի Հանրապետության սպորտի և երիտասարդության հարցերի նախարարությունը (այսուհետ՝ Նախարարություն):

5. Մրցույթի ընթացքում վնասվածքներ ստացած մասնակիցների բուժումը կատարվում է Հայաստանի Հանրապետության օրենսդրությամբ սահմանված կարգով:

4. ՄԱՍՆԱԿԻՑՆԵՐԸ

6. Մրցույթն անցկացվում է մեկ տարիքային խմբով՝ 2008 թվականից մինչև 2004 թվականը ծնված երեխա ունեցող ընտանիքների միջև:

7. Մասնակցության պայմաններն են՝

1) Մրցույթին կարող են մասնակցել ցանկություն ունեցող այն ընտանիքները, որոնք ունեն բժշկի թույլտվություն: Ընտանիքի անդամներից հայրը կամ մայրը պետք է լինեն անվասայլակով: Թիմի կազմը՝ հայրը, մայրը և երեխան՝ անկախ սեռից:

2) Մրցույթին թիմը մասնակցում է միասնական համազգեստով (սեպակոշիկներն արգելվում են):

8. Մրցույթին մասնակցում են Հայաստանի Հանրապետության մարզերից մեկական ընտանիք, Երևան քաղաքից՝ 12 (յուրաքանչյուր վարչական շրջանից մեկական ընտանիք) և ԼՂՀ-ից՝ մեկ ընտանիք:

5. ՄՐՑՈՒՅԹԻ ԱՆՑԿԱՑՄԱՆ ՊԱՅՄԱՆՆԵՐԸ ԵՎ ՄԱՐԶԱԶԵՎԵՐԸ

9. Մրցույթի մրցաձևերն են՝

1) Խաղային փոխանցումավազք 30 մ

Առաջին մասնակիցը՝ երեխան, մրցավարի հրահանգով վազքով մոտենում է ներքնակին, կատարում գլուխկոնձի առաջ վարժությունը (մեկնարկից ներքնակ՝ 5 մետր), վերցնում է ներքնակի առջև դրված օղակը (օղակի տրամագծի չափը՝ 20-25 սմ), ոլորապտույտ վազքով արագ անցնում է 5 գուրգերի միջով (ներքնակից մինչև 1-ին գուրգը՝ 3 մետր, գուրգերի հեռավորությունը՝ 3 մետր, վերջին գուրգից մինչև կանգնակ՝ 8 մ), վազքով մոտենում է կանգնակին (30-35 սմ բարձրությամբ), օղակը տեղադրում է կանգնակի վրա և այն շրջանցելով՝ վազքով վերադառնում է եզրագիծ՝ ձեռքի հպումով էստաֆետը փոխանցում է անվասայլակով ծնողին (անվասայլակավով մորը կամ հորը): Անվասայլակով մայրը (կամ հայրը) մոտենում է ներքնակի մոտ կանգնակի վրա դրված օղակին, այն վերցնելով՝ անվասայլակով ոլորապտույտ անցնում է 5 գուրգերի միջով, օղակը տեղադրում է կանգնակի վրա, շրջանցելով կանգնակը՝ արագ վերադառնում է եզրագիծ և էստաֆետը փոխանցում թիմի մյուս անդամին: Նույն վարժությունը կատարում է հաջորդ մասնակիցը (գլուխկոնձի առաջ վարժությունը ծնողները չեն կատարում): Վարժության ավարտից հետո էստաֆետը արագ հանձնում է երեխային: Երեխան առանց օղակի, ուղիղ վազքով արագ մոտենում է դիմացի կանգնակին, վերցնում է մեկ օղակ, վազքով մոտենում է եզրագծին տեղադրված

կանգնակին, օղակը գցում կանգնակի վրա: Նույնը կատարում են թիմի բոլոր անդամները: Վարժությունը եզրափակում է մայրը (կամը հայրը): Հաղթող է ճանաչվում այն ընտանիքը (թիմը), որը բոլորից արագն է ավարտում վարժությունը (վրկ):

2) Վարժություն բասկետբոլի գնդակով

Առաջին մասնակիցը՝ անվասայլակով հայրը կամ մայրը, մրցավարի հրահանգի համաձայն բասկետբոլի գնդակով (№ 6), մոտենում է բասկետբոլի օղակին (մեկնարկից օղակ՝ 8 մետր, օղակից նշակետ՝ 3 մետր), անցնելով նշագիծը՝ կատարում է նետում ազատ ոճով, արդյունավետ նետումից հետո գնդակով վերադառնում է մեկնարկ և հանձնում հաջորդ մասնակցին: Եթե անվասայլակով հայրը (կամ մայրը) վարժությունը արդյունավետ չի կատարում, ապա փորձում է երկրորդ անգամ, հետո միայն վերադառնում: Երկրորդ մասնակիցը, բասկետբոլի գնդակը վարելով, մոտենում է բասկետբոլի օղակին, անցնելով նշագիծը՝ կատարում է նետում ազատ ոճով, արդյունավետ նետումից հետո գնդակը վարելով վերադառնում է մեկնարկ և հանձնում հաջորդ մասնակցին: Եթե վարժությունը արդյունավետ չի կատարում, ապա վերցնում է գնդակը, վարելով հասնում մեկնարկ, շրջանցում է տեղադրված արգելքը և վերադառնում՝ նոր նետում կատարելու համար: Երկրորդ նետումից հետո (անկախ արդյունքից) վերադառնում է մեկնարկ և գնդակը հանձնում ընտանիքի մյուս անդամին: Նույնը կատարում են թիմի մյուս անդամները: Հաղթող է ճանաչվում այն ընտանիքը (թիմը), որը բոլորից արագն է ավարտում վարժությունը (վրկ):

3) Խաղային փոխանցումավազք՝ թենիսի գնդակներով

Առաջին համարի մասնակիցը՝ մայրը (կամ հայրը), մեկնարկային գծից մոտենում է գետնին մեկ ուղղությամբ դրված 3 օղակներին (օղակի տրամագիծը՝ 25-30 սմ): 1-ին օղակի մեջ դրված են թենիսի 5 գնդակներ (մեկնարկից 1-ին օղակ՝ 10 մետր, օղակների հեռավորությունը մեկը մյուսից՝ 2 մետր): Հայրը (կամ մայրը) վազքով մոտենում է 1-ին օղակին, վերցնում օղակի մեջ դրված 1-ին գնդակը, տեղադրում 2-րդ օղակի մեջ, վերադառնում 1-ին օղակի մոտ, վերցնում 2-րդ գնդակը, դարձյալ տեղադրում 2-րդ օղակի մեջ, և այդպես մինչև վերջին գնդակի տեղադրումը: Ավարտից հետո հայրը (կամ մայրը) շարունակում է վազքը, մոտենում վերջին օղակից 15 մետր հեռավորությամբ դրված զամբյուղին (տրամագիծը՝ 30-35 սմ), շրջանցում է այն և վազքով մոտենում մեկնարկային գծին, էստաֆետը հանձնում հաջորդ մասնակցին՝ երեխային: Երեխան, վերցնելով 2-րդ օղակի թենիսի 5 գնդակները, հերթականությամբ, ինչպես 1-ին մասնակիցը, տեղադրում է դրանք 3-րդ՝ 40-50 սմ բարձրություն ունեցող կանգնակի վրա դրված օղակի մեջ, վազքով մոտենում է զամբյուղին, շրջանցում այն և վերադառնում մեկնարկային գիծ՝ էստաֆետը հանձնելով անվասայլակով հորը (կամ մորը), որը, արագ մոտենալով կանգնակին, հավաքում է թենիսի 5 գնդակները, տեղադրում փոքրիկ պարկի մեջ, մոտենում նշագծին, կատարում 5 նետում զամբյուղի մեջ (նետումը կատարվում է ազատ ոճով) և վերադառնում: Յուրաքանչյուր անարդյունավետ նետման համար ընտանիքը ստանում է 1 տուգանային միավոր (յուրաքանչյուր 1 տուգանային միավորի դիմաց մասնակցի ժամանակին գումարվում է 1 վայրկյան, հեռավորությունը զամբյուղից նշագիծ՝ 2 մետր): Հաղթող է ճանաչվում այն ընտանիքը, որը բոլորից արագ է կատարել վարժությունը:

4) Խաղային փոխանցումավազք 80 մ (20 մ+ 20 մ + 40 մ)

Առաջին մասնակիցը՝ անվասայլակով հայրը (կամ մայրը), մրցավարի հրահանգի համաձայն արագ անցնում է 20 մետր և ձեռքի հպումով նշագծի մոտ էստաֆետը փոխանցում երկրորդ մասնակցին՝ հորը (կամ մորը), որը վազքով մոտենում է գետնին մեկ ուղղությամբ դրված մարմնամարզական 5 օղակներին (հեռավորությունը մեկը մյուսից՝ 3 մետր, մեկնարկից առաջին օղակ՝ 3 մետր, վերջին օղակից վերջնագիծ՝ 5 մետր), օղակները հաջորդաբար անցկացնելով գլխի վրայով՝ դնում է գետնին, վազքով մոտենում վերջնագիծ և ձեռքի հպումով էստաֆետը փոխանցում է երրորդ մասնակցին՝ երեխային: Վերջինս վազքով ոլորապտույտ անցնում է 4 գուրգերի միջով (մեկնարկից մինչև գուրգ՝ 4 մետր, գուրգերի հեռավորությունը՝ 2 մետր, ներքնակից վերջին գուրգ՝ 2 մետր), մոտենում է ներքնակին, կատարում գլուխկոնձի առաջ, այնուհետև անցնում է 8 մետր հեռավորության վրա դրված մեծ պարկի միջով (երկարությունը՝ 3 մետր, տրամագիծը՝ 70 սմ), վերցնում է 3 մետր հեռավորության վրա դրված փոքրիկ պարկը (չափսը՝ 25 սմ տրամագիծ, երկարությունը՝ 50 սմ), արագորեն պարկի մեջ է լցնում վազքուղու վրա շարված թենիսի 6 գնդակները (գնդակների հեռավորությունը մեկը մյուսից՝ 1 մետր) և պարկը ձեռքին վազքով հատում վերջնագիծը: Հաղթող է ճանաչվում այն ընտանիքը (թիմը), որը բոլորից արագ է ավարտում վարժությունը (վրկ):

5) Թենիսի գնդակի նետում

Գնդակի նետում վարժությունը կատարվում է մարզադաշտում՝ հատուկ նշագծված հատվածի սահմաններում: Թիմի յուրաքանչյուր անդամ ունի նետման երկու փորձի իրավունք: Հաղթող թիմը որոշվում է թիմի երեք անդամների նետման լավագույն արդյունքների ընդհանուր գումարով:

6) Օղակներով նետումներ նշանակելին

Յուրաքանչյուր թիմի մասնակիցները կատարում են հնգական նետում՝ 3 մետր հեռավորությունից:

Առաջին մասնակիցը իր ձեռքի օղակը (տրամագիծը՝ 25-30 սմ) նետում է իր առջև տեղադրված կանգնակին, որն ունի 40-50 սմ բարձրություն: Նույնը կատարում են հաջորդ մասնակիցները: Հաղթող է ճանաչվում այն թիմը, որի մասնակիցները բոլորից շատ նետած օղակներ ունեն կանգնակի վրա:

Զի թույլատրվում օղակը նետելիս անցնել նշագիծը: Հաղթող է ճանաչվում այն ընտանիքը (թիմը), որը բոլորից շատ դիպուկ նետումներ է կատարել:

10. Յուրաքանչյուր մարզաձևում մեկից ավելի թիմերի արդյունքների հավասարության դեպքում առավելությունը համապատասխանաբար տրվում է՝

- 1) ընտանիքի կազմում ավելի փոքր տարիքի երեխա ունեցող թիմին.
- 2) ընտանիքի կազմում ավելի մեծ տարիքի (գումարային) ծնողներ ունեցող թիմին.
- 3) ընտանիքի կազմում աղջիկ երեխա ունեցող թիմին:

11. Մրցույթի յուրաքանչյուր մարզաձևում որոշվում են 1-ինից 23-րդ տեղերը հետևյալ կերպ. 1-ին տեղ՝ 23 միավոր, 2-րդ տեղ՝ 22 միավոր, և այդպես մինչև վերջին տեղը:

12. Ընդհանուր միավորներով հաղթող թիմը որոշվում է առանձին մարզաձևում ձեռք բերված միավորների առավելագույն գումարով: Մեկից ավելի թիմերի միավորների հավասարության դեպքում առավելությունը համապատասխանաբար տրվում է՝

- 1) առանձին մարզաձևերում առավել բարձր մրցանակային տեղեր գրաված թիմին.
- 2) ընտանիքի կազմում ավելի փոքր տարիքի երեխա ունեցող թիմին.
- 3) ընտանիքի կազմում ավելի մեծ տարիքի (գումարային) ծնողներ ունեցող թիմին.
- 4) ընտանիքի կազմում աղջիկ երեխա ունեցող թիմին:

6. ՊԱՐԳԵՎԱՏՐՈՒՄԸ

13. Մրցույթին ընդհանուր թիմային հաշվարկում մրցանակային 1-ին, 2-րդ, 3-րդ տեղերը գրաված թիմերին տրվում են վկայագրեր, և թիմերը համապատասխանաբար պարգևատրվում են 500.0 հազար (հինգ հարյուր հազար), 400.0 հազար (չորս հարյուր հազար) և 300.0 հազար (երեք հարյուր հազար) դրամ դրամական մրցանակներով:

14. Մրցույթի առանձին մարզաձևերից առաջին տեղերը գրաված թիմերը Նախարարության կողմից պարգևատրվում են 100.0 հազար (հարյուր հազար), 2-րդ տեղերը 50.0 հազար (հիսուն հազար) և 3-րդ տեղերը՝ 30.0 հազար (երեսուն հազար) դրամ մրցանակներով:

Պարգևատրվում է նաև ամենակրտսեր մասնակիցը՝ 100.0 հազար (հարյուր հազար) դրամով:

7. ԾԱԽՍԵՐԸ

15. Մրցույթի կազմակերպման և անցկացման հետ կապված ծախսերը (մրցումների անցկացման համար մարզագույքի, անհրաժեշտ պարագաների և մրցավարների մարզահագուստի ձեռքբերում, մասնակից բոլոր երեխաների համար նվերների ձեռքբերում, գովազդային նյութերի պատրաստում, մրցավարների գործուղում, գիշերավարձ, օրապահիկ, ճանապարհաձախս, մրցավարներին դրամական պարգև, մրցանակային տեղեր գրաված թիմերին դրամական մրցանակներով պարգևատրում, վկայագրերի պատրաստում, կրծքանշանների պատվիրում, տրանսպորտային միջոցների ապահովում) իրականացվում են տարեկան պետական բյուջեով նախատեսված «Հայաստանի Հանրապետության Նախագահի մրցանակի համար «Լավագույն մարզական ընտանիք» մրցույթի անցկացում» ծրագրի միջոցով:

16. Մրցույթի մասնակից ընտանիքների գործուղման հետ կապված ծախսերը՝ գիշերավարձի, սննդի և ճանապարհաձախսի, իրականացվում են տարեկան պետական բյուջեով նախատեսված «Հայաստանի Հանրապետության Նախագահի մրցանակի համար «Լավագույն մարզական ընտանիք» մրցույթի անցկացում» ծրագրի միջոցով, իսկ մասնակից ընտանիքների մարզահագուստի ծախսերը հոգում են գործուղող կազմակերպությունները՝ Հայաստանի Հանրապետության մարզպետարանները, Երևանի քաղաքապետարանը և Լեռնային Ղարաբաղի Հանրապետության կառավարությանն առընթեր սպորտի պետական կոմիտեն:

8. ՀԱՅՏԵՐԸ

17. Մրցույթի մասնակցության անվանական հայտերը՝ հաստատված մարզպետի, Երևանի քաղաքապետի, Լեռնային Ղարաբաղի Հանրապետության կառավարությանն առընթեր սպորտի պետական կոմիտեի նախագահի կողմից, ներկայացվում են Նախարարություն մինչև 2014 թվականի հուլիսի 1-ը: Նշված ժամկետից ուշ ներկայացված հայտերը չեն ընդունվում:

18. Մրցույթի ընդունելության օրը հայտի հետ միասին թիմը մանդատային հանձնաժողովին է ներկայացնում՝

- 1) անձնագիր (հոր, մոր),
 - 2) ամուսնության վկայականը,
 - 3) տեղեկանք լուսանկարով՝ բնակության վայրից,
 - 4) երեխայի ծննդյան վկայականը:
- Ներկայացվում են փաստաթղթերի բնօրինակները:

ԱՇԽԱՏԱԿԱԶՄԻ ՂԵԿԱՎԱՐԻ
ԺԱՄԱՆԱԿԱՎՈՐ ՊԱՇՏՈՆԱԿԱՏԱՐ՝



Մ. ԱՆԱՆՅԱՆ